

**1 Təsalonaikə**  
**Nauəuə iətəm Pol təmaupən mətei**  
**tuvən kəm nəfaki mın ikin**  
**Təsalonaikə**  
**Nəghatiən əkuəkir rəha nauəuə**  
**u 1 Təsalonaikə**

**? Pəh təmətei nauəuə u?** Aposil Pol təmətei nauəuə u.

**? Təmətei tətuvən kəm pəh?** Təmətei tətuvən kəm niməfaki əpəha Təsalonaikə.

**? Natigian təhro lanu nian təmətei?** Pol təmətuəuin niməfaki əpəha Təsalonaikə e nu keiu o kisil əmə tınuvən rəkis, kəni in niməfaki vi kəti. Nətəmimi rəha niməfaki okotəkeikei moteviə e nəmiəgəhiən rəhalah. İlah nəuvein, kəməhuvən e nian iəkis mın mətəu-inu kəutəhatətə e Krısto. Kəni nəuvein kəsotəhrun vivian nian iətəm İesu otitəlig=pa mın lan e nəhue niftəni. Nəuvein nıkilah təhti məmə İesu otuva uəhai mın əmə. Kəni motəruru məmə nətəmimi kəmoħmıs uərisig e İesu titəlig=pa mın, otəhro e lah.

**? Təmətei nauəuə u o nak?** Pol təmətei nauəuə u məmə otəfəri nətəligian rəhalah, kəni mol nəhatətəian rəhalah təskasik. Kəni molkeikei məmə otəfən nəgətunian nəuvein iətəm təhruahru o nitəlig=pa minian rəha İesu Krısto.

*Pol təməni təuvir kəm lah*

<sup>1</sup> İəu Pol, mıne Sailəs,\* mıne Timoti, iəhləni təuvir kəm təmah mın u niməfaki ikin Təsalonaikə,

\* **1:1** E nəghatiən Kris, nərgin u Sailəs in “Silfanus”

u itəmah u nətəmimi rəha Tatə Uhgın mine İərmənig İesu Krısto.

Pəh Uhgın otətuati e rəhan nəuviriən mine nəməlinuiən kəm təmah.

<sup>2</sup> Nian rəfin, iəhləni=pən kəm Uhgın məmə nikitimahal tətəgiən o təmah rəfin, kəni məhləfaki o təmah e nəfakiən rəhatimahal. <sup>3</sup> Nian iəhləfaki kəm Tatə Uhgın, nikitəmahal tagiən mətəu-inu nian rəfin nikitimahal tətəhti nati kisil, kəti u rəhatəmah uək iətəm tatsipən e nəhatətəiən rəhatəmah, mine rəhatəmah uək əskasik o nasiruiən e nətəmimi iətəm tatsipən e nolkeikeiən rəhatəmah, mine noliən rəha nəhtul əskasikiən rəhatəmah e nian iəkis min iətəm kəutəhuva e rəhatəmah nəmiəgəhiən, kəni nəkotol lanəha mətəu-inu nəmotələhu=pən əskasik rəhatəmah nətəligiən e İərmənig İesu Krısto.

<sup>4</sup> Piak min mine nəuvinik min iətəm Uhgın tolkeikei itəmah. Nikitimahal tagiən min o təmah mətəu-inu iəkləhrun məmə Uhgın təmitəpin itəmah. <sup>5</sup> Kəni iəkləhrun nati u, mətəu-inu nanusiən təuvir iətəm iəməhləni kəm təmah, səniəmə təmuva e nəghatiən əmə, mətəu təmuva min e nəsanəniən, mine Narmın Rəha Uhgın, kəni kitah kotəhrun vivi məmə in niyəhriniən. Kəni nian kitah kəməutatig, nəkotəhrun məmə noliən rəhatimahal in təuvir məmə otasiru e təmah. <sup>6</sup> Kəni iəmleruh məmə itəmah nəmotisikəuvin itimahal mine İərmənig e noliən u: nəmotos pau nahməiən asoli, mətəu nəmotos nəghatiən e nikin agiən iətəm Narmın Rəha Uhgın təməfinə.

<sup>7</sup> Tol lanəha, e noliən rəhatəmah nəmotəgətun suaru təuvir kəti kəm nəfaki min əpəha Masetoniə mine Akaiə kotisikəuvin itəmah. <sup>8</sup> Nəmotəni

pətigəm nəghatiən rəha Uhg'in təhmen e təui təmasək kətəu ikin m'in rəfin, kəni səniəmə əpəha Masetoniə mine Akaiə əmə, mətəu nətəmimi ikin m'in rəfin kinotəhrun rəkis rəhatəmäh nəhatətəiən. Tol lanəha, iəsləni pətigəmiən nanusiən rəha nəhatətəiən rəhatəmäh, <sup>9</sup> mətəu-inu nətəmimi rəha Masetoniə mine Akaiə, ilah aru kəutəni pətigəm məmə nian iəməhuva moteruh itəmäh, nikitəmäh tagiən o nətəuiən nəghatiən rəhatiməhal. Kəutəni pətigəm məmə itəmäh nəmotəuhlin nəmtəhtəmäh e narm'i nati m'in u kəmol əmə ilah, kəni mautəhuərisig e Uhg'in iətəm tətəmiəgəh, kəni in Uhg'in pəhriən, <sup>10</sup> kəni nəutəhtahnin Nət'in məmə otitəlig=pa m'in e negəu e neai muva m'in e nəhue niftəni. Nət'in u in Iesu, iətəm təmimis e nig'i kəluau, kəni Uhg'in təmosmiəgəh in e nimisiən. Kəni in otosmiəgəh itah e nalpiniən mine niəməha rəha Uhg'in iətəm tətəuə.

## 2

### *Uək rəha Pol əpəha Təsalonaiyə*

<sup>1</sup> Piak m'in mine nəuvinik m'in. Nəkotəhrun məmə nian itiməhal iəmluəa mihleruh itəmäh, nuvaiən rəhatiməhal, in səniəmə tol nati əpnəp'in əmə lan, mətəu təmol nəuan. <sup>2</sup> Kəni itəmäh nəkotəhrun məmə inəha Filipai, nətəmimi kəmotol təräh e timəhal, kəni motahi motəni rah itiməhal, mətəu Uhg'in rəhatah təmasiru e timəhal, kəni itiməhal iəsləginien e nəni pətigəmiən rəhan nanusiən təuvir kəm təmah, nati əpnəp'in nətəmimi kəmotalkut məmə okotəniəhu itiməhal. <sup>3</sup> Tol

lanəha mətəu-inu rəhatımahal nəghatiən o niuviən rəhatəmah nətəligiən təsisipəniən e nətəligiən tərəh mın uə nikin iətəm təsəhruahruian, kəni iəslalkutiən o neiuəiən e təmah. <sup>4</sup> Kəpə, iəsloliən lanəha. Mətəu nian iəhləghati, iəkləhrun məmə Uhgın təməsal=pən rəkis e nikitımahal, kəni məni məmə itımahal iəkləhmen məmə iəkləni pətigəm nanusiən təuvir, kəni in təmələhu=pən e nəhlmitımahal. Kəni iəsləghatiən məmə nətəmimi nikelah otagiən o tımahal, mətəu iəhləghati məmə Uhgın nikin otagiən o tımahal, kəni in Uhgın iətəm tətəsal=pən e nikitımahal. <sup>5</sup> Nəkotəhrun məmə itımahal iəsluvaian o təmah məmə iəkliuvi nətəligiən rəhatəmah e nəghatiən ətəhiən mın. Kəni iəsləni pətigəmiən nanusiən təuvir kəm təmah məmə iəklə rəhatəmah məni. Kəni Uhgın, in təhrun nikitımahal məmə nəghatiən u in nipehriənien. <sup>6</sup> Itımahal iəsluvaian məmə itəmah kəti uə iətəmimi əpnəpın əmə kəti otəfəri itımahal.

<sup>7</sup> Kəni nati kəti mın, mətəu-inu itımahal aposil milahal rəha Kristo, iəkləhrun nəniən məmə nəkotəkeikei motisiai itımahal təhmen e iətəmi asoli milahal, mətəu iəməsloliən. Nian kəməutatig, noliən rəhatımahal tımətig təhmen e məmə kəti iətəm tateh vivi nenətin mın, matol tımətig o lah. <sup>8</sup> Nikitımahal tagiən məmə iəkləni pətigəm nanusiən təuvir, mətəu səniəmə məmə iəhləni pətigəm əmə, mətəu iəmhlol natimnati rəfin iətəm iəkləhrun noliən məmə otəsiru e təmah. In təhmen məmə iəmhləfinə nəmiəgəhiən rəhatımahal, mətəu-inu itımahal iəmhlolkeikei itəmah, kəni nəməhuva rəhatımahal nətəmimi. <sup>9</sup> Piak mın mine nəuvinik mın. ?Nikitəmah təhti, uə kəpə,

uək əskasik iətəm iəmahlol? Nian itimahal iəməhləni pətigəm nanusiən təuvir rəha Uhgın kəm təmah, itimahal iəmahlol uək e nəhlmitimahal ləplapın mətəuarus=pən lapın o nosiən məni məmə iəslətapuəhiən o məni o təmah.

<sup>10</sup> Itəmah mine Uhgın, nəmoteruh kəni motəhrun nəni pətigəmiən məmə nian iəməhlatig kitah min itəmah nəfaki mın, noliən rəhatimahal in təhruahru, kəni Uhgın tətəgiən lan, kəni iətəmimi kəti təsosiən nıpəgnəmtin kəti iətəm tərəh o tımahal. <sup>11</sup> Itəmah nəkotəhrun məmə itimahal iəmahlol təuvir kəm təmah rəfin təhmen e tatə kəti tateh vivi nenətin mın. <sup>12</sup> Kəni e noliən kətiəh əmə, iahlem əskasik itəmah, kəni mahləfəri rəhatəmah nətəligiən, məhlətapuəh əskasik məmə nəmiəgəhiən rəhatəmah otəhruahru e nəhmti Uhgın, kəni nıkin tagiən lan. Uhgın u, tətəuin e təmah məmə nəkəhuva e narmənigiən mine nəuviriən rəhan.

<sup>13</sup> Kəni nian rəfin, itimahal iəhləni tagkiu kəm Uhgın mətəu-inu nian nəmotos nəghatiən rəha Uhgın iətəm nəmotətəu o tımahal, kəni motos tatig e nikitəmah, kəni nikitəmah təsəhtiən məmə in nəghatiən rəha nətəmimi əmə, mətəu nikitəmah təhti məmə in nəghatiən rəha Uhgın, kəni pəhriən in nəghatiən rəhan. Kəni nəghatiən u tatol uək e nəmiəgəhiən rəhatəmah, u nətəm nəutəni nıpəhriəniən lan. <sup>14</sup> Kəni piak mın mine nəuvinik mın. Nətəmimi imatəmah əhruahru ikin, kəmotol tərəh e təmah mətəu-inu nəməutəhatətə e Kristo İesu. Itəmah nəkotəhmen e nətəmimi rəha nıməfaki mın rəha Uhgın əpəha ikin Jutiə. İlah nətəm İsrəl əhruahru, mətəu rəhalah aru

nətəmi asoli mın kəmotol nərahian e lah nian kəmotəhatətə e Kristo Iesu. <sup>15</sup> Nətəmi asoli mın u, kəmotuhamu İərməniğ Iesu, mine iəni mın, kəni motəhgi pətigəm itimah iəkohiet. Noliən rəhalah tatol niki Uhgın təsagiəniən, kəni ilah tikiimir mın o nətəmini rəfin, <sup>16</sup> mətəu-inu nətəmi asoli mın u kəutalkut məmə okotəniəhu itimah o nəghatiən kəm Nanihluə\* mın məmə Uhgın otosmiəgəh ilah. E noliən əha, ilah kotoriarun rəhalah noliən tərəh mətəuarus təhmen. Mətəu rəueiu əha, niəməha mine nalpiniən rəha Uhgın tinuva o lah.

*Pol təmolkeikei məmə oteruh ilah*

<sup>17</sup> Piak mın mine nəuvinik mın. Nian iəmhluvən isəu o təmah nian nəuan nəuvetin əmə, mətəu iəmhlokeikei pik məmə iəkleruh mın itəmah. Nipəhriəniən, nipətital isəu o tah mın mətəu nətəligiən rəhatah kətiəh. Kəni iəməhlalkut pik məmə iəklətəlig mihleruh itəmah, <sup>18</sup> mətəu-inu iəmhlokeikei məmə iəkluvnə o təmah. İəu, Pol, iəmalikut nian tepət, mətəu Setən təmahtipəsəg e suaru o timahal. <sup>19</sup> ?Təhro iəklolkeikei pik məmə iəkleruh mın itəmah? ?Tol lanəha mətəu-inu, nian İərməniğ Iesu otuva mın, pəh mın u iəmlələhu=pən nətəligiən əskasik rəhatimahah e lah məmə ilah nəua uək təuvir rəhatimahah? ?Kəni nikitimahah otagiən mın o pəh mın? ?Kəni pəh mın u in rəhatimahah nətəuiən iətəm nikitimahah otagiən e lah? ?İtəmah, uə kəpə? Əuəh, itəmah u. <sup>20</sup> Nipəhriəniən, itimahah iəhlətəu təuvir o təmah, kəni nikitimahah tagiən o təmah.

---

**2:14** Uək 17:5    **2:15** Uək 9:23,29; 13:45,50; 14:2,5,19    \* **2:16**  
Nanihluə, İanihluə – Afın-to e tiksınəri.    **2:19** Fil 2:15-16; 4:1;  
2Təs 1:4

### 3

<sup>1</sup> Tol lanəha, nian nikitimahal təməpəou kəni iuəkır nikitimahal titəgıt, mətəu-inu itimahal iəkləruru məmə nəutatıg təuvır uə kəpə, kəni itimahal iəmhlegəhan məmə iəu mine Sailəs iəkuatıg Atens, <sup>2</sup> iəmuahli=pinə Timoti məmə in otuvnə meruh itəmah. In piatah kəti iətəm tatol uək rəha Uhgın itimahal min o nəni pətigəmiən nanusiən təuvır rəha Kristo. In təmuvnə o təmah məmə otasıru e təmah məfəri rəhatəmah nətəligiən, kəni mol itəmah nəutəhtul əskasik e rəhatəmah nəhatətəiən, <sup>3</sup> məmə nərahıən iətəm tətuvə o təmah rəueiu, ko təsoliən nikitəmah təhti pık. Nəkotəhrun rəkis məmə in nətəligiən rəha Uhgın məmə nətəmimi okotol tərah e tah lanəha. <sup>4</sup> Nipəhriəniən, nian iəməhlatıg kitah min itəmah, iəməhləkeikei məhləni kəm təmah məmə okol tərah e təmah. Kəni itəmah nəkotəhrun vivi məmə tınuva mol nipəhriən lan təhmen əmə məmə itimahal iəmhləni mine. <sup>5</sup> Kəni o nati əha, nian iəməsəhruniən məmə natıgiən rəhatəmah təhro, kəni nıkik təməpəou kəni iuəkır nıkik titəgıt, kəni iəmahli=pinə Timoti məmə otuvnə meruh-to rəhatəmah nəhatətəiən, məmə tatəskasik əhanəh, uə kəpə. İəməgin məmə e suaru kəti, Setən u iətəmimi rəha nəfən-əfəniən, in təməfən-əfən kəm təmah, kəni nəkotəmkarəpən e nəhatətəiən rəhatəmah, kəni uək rəhatimahal in tol nati əpnəpın əmə.

#### *Timoti təməni pətigəm nanusiən təuvır*

<sup>6</sup> Kəni rəueiu əha, Timoti təmitəlig=pa min o tımlau, kəni matos nanusiən təuvır e rəhatəmah

nəhatətəiən mine nolkeikeiən. Təməni=pa kəm timlau məmə nikitəmah tətəhti əhanəh itimahal, təhmen əmə məmə itimahal iəklolkeikei məmə iəkleruh itəmah. <sup>7</sup> Tol lanəha, piak mın mine nəuvinik mın, nati əpnəpın iəmhlatig e nərahian, kəni mihlətəu nahməiən, mətəu nanusiən rəha nəhatətəiən rəhatəmah təməfəri rəhatimahal nətəligiən o təmah. <sup>8</sup> Nian iəmlös nanusiən məmə nautəhtul əskasik əhanəh o İərməniğ, kəni iəklətəu məmə inhlös mın nəmiəğəhiən. <sup>9</sup> Nian iəkləhtul e nəhmti Uhgın, nəgiəniən rəhatimahal o təmah in iahgin, kəni iəkləni kəm Uhgın məmə nikitimahal tagiən pik o təmah. <sup>10</sup> E nian rəfin, lənian mine lapın, iəhləfaki əskasik məmə iəkleruh mın itəmah, kəni mihləgətun itəmah e nati nak nəkotəruru əhanəh məmə rəhatəmah nəhatətəiən oteviə məskasik.

<sup>11</sup> Kəni pəh rəhatah Uhgın aru, u Tatə rəhatah, mine İərməniğ İesu rəhatah, kuol suaru rəhatimahal məmə iəkluvnə mihleh itəmah. <sup>12</sup> Pəh İərməniğ otol nolkeikeiən rəhatəmah otepət məri məriəuəh o təmah mine nətəmimi rəfin, təhmen e nolkeikeiən rəhatimahal o təmah tepət. <sup>13</sup> Pəh in otol nikitəmah otəsanən məmə, nian İərməniğ İesu tətuvə mın ilah rəhan mın nətəmimi, kəni nəkotəhtul e nəhmti rəhatah Uhgın u Tatə rəhatah, kəni nəkotəhlan kəni nolien tərəh tikə e təmah.

## 4

*Nəmiəğəhiən rəhatəmah təkəikei mol Uhgın nikin tagiən*

<sup>1</sup> Piak mın mine nəuvinik mın, rəueiu iəkəikei məğhati e natimnati mın nəuvein. İəmləgətun



rəkis itəmah e noliən iətəm nəkotol məmə Uhgın nıkin otagiən o təmah. Kəni pəhriən, onəkotol lanəha. Kəni rəueiu iəhlətapuəh o təmah kəni məhlətapuəh əskasik e İərməniğ İesu məmə nau-tol təhmın mın lanko. <sup>2</sup> Otol lanəha mətəu-inu itəmah nəkotəhrun suaru iətəm iəmləgətun itəmah lan, kəni İərməniğ İesu təməfa nepətiən məmə iəkləgətun itəmah lan.

<sup>3</sup> Nətəligiən rəha Uhgın məmə in təmələhu kalın itəmah məmə rəhan mın məmə nəkotol nati iətəm təhruahru vivi: sotohtəu-pəniən suaru rəha nıpətan mine nəman iətəm kautit oneuən ilah mın.

<sup>4</sup> Itəmah kətiəh kətiəh nəkotəkeikei motərməniğ e nıpətitəmah e noliən iətəm təuvır məhruahru kəni kisiai. <sup>5</sup> Sotoliən noliən rəha nıtəu-pəniən nətəligiən əskasik o nit oneuəniən pətan uə iərman. Noliən əha rəha nətəm kəsotəfakiən motəruru Uhgın. <sup>6</sup> Kəni e natimnati mın əha, sotoliən tərəh e piətəmah mın e nakləhiən e pətan rəha iətəmi pişin. İərməniğ otol nalpiniən kəm nətəmimi mın u iətəm kautol noliən mın iətəm tol lanəha, kəni inhləni rəkis nati u kəm təmah o nəhgi-pəriən itəmah. <sup>7</sup> Tol lanəha mətəu Uhgın təməsauniən e tah məmə okotamikmik e nəhmtin, okotatig e nəmiəgəhiən iətəm kəmotələhu kalın məmə rəhan. <sup>8</sup> Tol lanəha, iətəm tətəuhlin nəmtahn e nəghatiən əha, səniəmə tətəuhlin nəmtahn kəm iətəmimi, mətəu tətəuhlin nəmtahn kəm Uhgın iətəm təməfa Narmin Rəhan kəm təmah.

<sup>9</sup> Nəkotəhrun rəkis noliən rəha nolkeikeiən itəmah iəfaki mın, kəni təsəhmenien mın məmə iəkətei e nauəuə, mətəu Uhgın tinəgətun rəkis

itəmäh o nolkeikeiän itəmäh mìn. <sup>10</sup> Kəni pəhriän, nəkotolkeikei piatah mìn rəfin ikin Masetoniä. Mətəu, piak mìn mine nəuviniik mìn, iəklətapuəh əskasik məmə nəkautol təskasik təhmìn lanko lan.

<sup>11</sup> Itəmäh nəkotəkeikei motalkut o nitəu-pəniän suaru rəha nəmiəgəhiän iətəm in təməlinu, kəni motol aru rəhatəmäh uək, kəni nəkautol uək e nəhlmitəmäh məmə nauəniän rəhatəmäh mine natiəmnati mìn otəhmen, təhmen əmə məmə iəhhləni mine kəm təmah. <sup>12</sup> Otol lanəha məmə rəhatəmäh nəmiəgəhiän otiuvi=pa nisiaiän rəha nətəm ihluə mìn, kəni itəmäh nəsotarəriəiän e suah kəti.

### *Nuvaian rəha İərməniğ*

<sup>13</sup> Piak mìn mine nəuviniik mìn. İəklolkeikei məmə itəmäh onəkotəhrun itəmäh mìn nəuvein u kinohmis rəkis, məmə kinəhro e lah. Kəni iəslolkeikeiän məmə itəmäh nəkotasək təhmen e nətəmimi nətəm kəsotələhu-pəniän rəhalah nətəliğiän e Uhgìn u təhrun nauməhtulian e nətəmimi e nımisiän. İlah okotəkeikei motasək pik. Mətəu kitah okəsotasək pikiän, mətəu inu <sup>14</sup> kitah kəutəhatətə məmə İesu təmimis kəni məmiəgəh mìn, kəni nikitah təhrun məmə nian İesu otuva mìn, kəni Uhgìn otol məmə, nətəmi mìn u nətəm kinotəhatətə rəkis e İesu nian kəmoəhmis, okəhuva mìn ilah İesu. <sup>15</sup> Kəni iəhləni kəm təmah nəghatiän əhruahru rəha İərməniğ məmə, kitah u nətəm kəutəmiəgəh əhanəh məutatig mətəuarus nuvaiän rəha İərməniğ, pəhriän kitah okəsotaupəniän e nətəmi mìn u nətəm kəmotəupən mohmis.

<sup>16</sup> Mətəu İərməniğ əhruahru əmə otsipəri e negəu e neai meiuaiu=pa, kəni məni pətigəm əfəmäh,

kəni iətəmi asoli rəha nagelo mın otagət əfəməh, kəni nətəmimi okotətəu təui rəha Uhgın, kəni nətəmi mın u nətəm kınotəhatətə rəkis İesu nian kəmoħmıs, okotəmiəgəh motaupən motəri. <sup>17</sup> Kəni uərisig lan, kitah nətəm kəutəmiəgəh əhanəh, okotəri kitah mın ilah e nimali nəpuə məmə okoteruh İərmənig e magəuagəu. Kəni tol lanəha, okotətig kitah İərmənig naunun tikə. <sup>18</sup> Tol lanəha, otəfəri nətəligiən rəhatəmah mın e nəghatiən mın u.

## 5

<sup>1</sup> Piak mın mine nəuvinik mın. Təuvir əmə məmə iəsətəiən kəm təmah e nian əhruahru rəha natimnati mın əha, <sup>2</sup> mətəu-inu itəmah nəkotəhrun rəkis məmə nian iətəm İərmənig otuva mın e nəhue niftəni u təhmen e iakləh iətəm tətuvə lapın, nian nətəmimi əpnəpın kotəruru məsotəhtul maruiən ohni. <sup>3</sup> Nian nətəmimi kəutəni məmə, “Natimnati rəfin təməlinu, kəni nərahien tikə,” kəni nalpiniən mine niəməha rəha Uhgın otuva uəhai əmə o lah, kəni ko nətəmimi kəsotəgimiən, təhmen e pətan iətəm nəmtahn tətəhmə o neməkiən, nəhməiən tətuvə uəhai əmə, kəni ko pətan əha otəsəgimiən.

<sup>4</sup> Mətəu piak mın mine nəuvinik mın, iateruh məmə nəsotəhtulien e napinəpuien e natimnati mın əha, kəni nuvaiən rəha nian əha otəsoliən itəmah nəkotəuit təhmen e nətəmimi u kotəuit nian iakləh kəti təmuva. <sup>5</sup> Itəmah rəfin nenəti nəhəgəhəgiən mine nenəti nianiən. Kitah səniəmə nətəmimi rəha lapın mine napinəpuien. <sup>6</sup> Kəni

tol lanəha, pəh kəsotoliən təhmen e nətəmi mın u kəutapili, mətəu pəh kotair kəni maüteruh vivi rəhatah nətəligiən mine rəhatah noliən mın, <sup>7</sup> mətəu nətəmimi mın u kəutapili, ilah kəutapili lapin, kəni nətəmi mın u kəutapis, ilah kəutapis lapin. <sup>8</sup> Mətəu pəh kitah kotarməniḡ e noliən mın rəhatah, mətəu-inu kitah nətəmi rəha ni-anian. Pəh kotaskəlim noliən rəha nəhatətəian mine nolkeikeian məmə nəpaliən kəti, inu təhmen e soldia kəti iətəm tətəfən napən təhmen e aiən iətəm tətəməhli pəsḡ e nımankilahatəmi məmə nəpaliən kəti. Kəni pəh kotələhu=pən əskasik rəhatah nətəligiən e Uhgın məmə nəpaliən kəti, inu təhmen e soldia kəti iətəm titaharu=pən kəfəfau əskasik kəmol e aiən iətəm tətəhtərain rəhn-kapə təmi məmə nəpaliən kəti.

<sup>9</sup> Pəh kotal lanəha mətəu Uhgın təməsauin rəkisiən e tah məmə niəməha mine nalpiniən rəhan otuva o tah, mətəu təmitəpın itah məmə in otosmiəḡəh itah e rəhatah İərməniḡ İesu Kristo. <sup>10</sup> Təmimis o tah məmə kitah kotəhrun natigiən pəti kitah min nəmə kautəmiəḡəh uə kəməhmis. <sup>11</sup> Tol lanəha, onəkotəfəri rəhatəmah mın nətəligiən, kəni otasiru e təmah mın məmə nəkotol nəhatətəian rəhatəmah təskasik. Pəhriən, inu noliən itəmah nəkotol u rəueiu.

### *Naunun nəḡhatian rəha Pol*

<sup>12</sup> Piak mın mine nəuvinik mın. Rəueiu iəklətapuəh o təmah məmə nəkotisiai nətəmi mın u kautol uək əskasik itəmah min ilah, kəni məutarməniḡ e təmah e İərməniḡ, kəni məutagət

asoli e təmah nian nəkotəmkarəpən motol tərəh. <sup>13</sup> Otisiai vivi ilah motolkeikei ilah o uək iətəm kautol, kəni motatig e nəməlinuiən kəni məsotetetiən e təmah mın.

<sup>14</sup> Kəni piak mın mine nəuvinik mın, iəhlətapuəh əskasik məmə nəkotagət əskasik e nətəmi mın u kəutəlpah məsotoliən nati kəti. Otəfəri nətəligiən rəha nətəmi nıkilah təpəou. Otasiru e nətəmi rəhalah nəsanəniən tikə. Otol rəhatəmah nətəligiən təfəməh o nətəmi rəfin. <sup>15</sup> Nəmə iətəmi kəti otol nati kəti təsəhmenien e təmah, kəni itəmah nəsotalpiniən nitai nərahien, mətəu nian rəfin, itəmah nəkotəkeikei motalkut məmə nəkotol təuvir kəm təmah mın mine nətəpisiən pisiən mın.

<sup>16</sup> Nıkitəmah otəkeikei mətagiən nian rəfin; <sup>17</sup> kəni motəghati kəm Uhgın e nəfakiən nian rəfin; <sup>18</sup> kəni nian rəfin otəni kəm Uhgın məmə nıkitəmah tagiən, nati əpnəpın nəkotatig e nəuviriən, uə nərahien. Otol nati milahal əha mətəu-inu ilahal nəuia Uhgın o təmah e Kristo Iesu.

<sup>19</sup> Sotalıfu əpisiən nigəm rəha Nərmin Rəha Uhgın; <sup>20</sup> sotəniən məmə nəghatiən iətəm Uhgın təməfən kəm iətəmi kəti in tol nati əpnəpın əmə lan. <sup>21</sup> Otaupən pıpım moteruh kəni motakil vivi natimnati rəfin, kəni otaskəlim tiəkis nati iətəm təuvir, <sup>22</sup> kəni motəpəh natimnati rəfin iətəm tərəh.

<sup>23</sup> Pəh Uhgın pisiən əmə iətəm in Uhgın rəha nəməlinuiən, otol itəmah məmə rəhan pisiən əmə u itəmah. Pəh Uhgın otol məmə nəmiəgəhiən rəfin rəhatəmah okotəruahru, e narmitəmah mine e nətəligiən rəhatəmah mine e nıpətitəmah. Kəni

**5:14** 2Təs 3:6,11**5:15** Rom 12:17; 1Pitə 3:9**5:16** Fil 4:4**5:18** Efəs 5:20**5:19** Efəs 4:30**5:22** 1Jon 4:1

nipəgnəmtin kəti tikə mə otəhkuł=pən e təmah,  
nian rəhatah İərməniğ İesu Kristo tətuvə min.

<sup>24</sup> İətəm tətəuin e təmah, nian rəfin tatol rəhan  
nəghatiən, kəni in otol natimnati min əha.

<sup>25</sup> Piak min mine nəuvinik min. Otəfaki o timah.

<sup>26</sup> Otəni təuvir kəm təmah min təhmen məmə  
itəmah kətiəh əmə e Kristo. <sup>27</sup> E nərgi İərməniğ,  
iətəni əskasik kəm təmah məmə nəkotafin nauəuə  
u kəm piak min mine nəuvinik min rəfin.

<sup>28</sup> Pəh rəhatəmah İərməniğ İesu Kristo otətuati e  
rəhan nəuviriən kəm təmah.

**Nauəuə Asim Rəha Uhg̃in Nəmtət̃iən Vi**  
**The New Testament in the Whitesands language of**  
**Tanna Island, Vanuatu**  
**Niutesteman long Nərak, lanwis blong Whitesands**  
**Tanna, Vanuatu**

Copyright © 2014 Wycliffe Bible Translators, Inc.

© Wycliffe Bible Translators, Inc.

Language: Whitesands

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 22 Feb 2024 from source files dated 31 Aug 2023

913a182a-255f-5344-b6b0-0294ba221e87